



16
2797
4



門 16
2797
卷 4

原序

文章之在天下也如日月經天江河行地所謂經國之大業不朽之盛事是也然觀古今以來著述之家何啻千萬其人以文重乎抑文以人重乎人以文重者猶夫文人之文也其文未足多文以人重者非猶夫文人之文也其文斯可尚矣何者有聖賢之人斯有聖賢之文有忠孝節義之人斯有忠孝節義之文聖賢之文不離乎道德忠孝節義之文根極於性天所以宣之而爲經矢之而成訓卽其遊覽山川酬答朋侶與夫吟詠性情寓物託興之作春容

昭和十九年
一月三日
購求

乎大篇寂寥乎短韻讀其文無不可以想見乎其人而非
一切文章之士依倣比擬於辭藻聲律之間所得而相並
者蓋情之至者性之至也性真故情真情真而文亦真也
吾鄉蔡江門先生當明季崇禎閒爲長沙司李遭流賊之
難慷慨捐軀其孤忠勁節旣已與唐之張許輩鼎峙千秋
爭光日月當亦無俟推論矣惟是詩文爲先生精神心術
之所存宜搜輯而表章之以傳於後世然覓其殘篇斷稿
寥寥不可得意者先生妙年登第從仕未幾卽身死國難
或者無多著述又或鼎革之際兵燹相仍卽有論撰亦埋

歿於荒草冷煙之中而不可復邁耶迨余薄宦楚南因得
謁先生之祠訪故老而詢其遺事嗣後又得悔後集讀之
卒編撫几而歎曰嗚呼如先生之人不必以詩文傳也卽
先生以詩文傳其詩文亦不必作文字觀也綱常萬古節
義千秋雖農夫走卒兒童婦女聞公之名知公之事猶且
咨嗟涕洟恨不得取逆賊之屍而盡戮之以報公於地下
而况學士大夫讀其書誦其詩以想見其人而追論其事
必有油然而動其愛君殉國之思者則夫先生之英風義
烈所以興激懦頑而綱維世教爲何如哉甚矣先生之詩

文不必傳而又不必不傳也先生之詩文不必作文字觀而又何妨竝以文字重也凡爲臣子者聞風而起可取昔日之忠之節以光其今日之詩之文又可取今日之詩之文以著其昔日之忠之節則茲悔後一集當與天壤相倣者也卽先生之名亦當與天壤相倣者也謂詩文以先生重以先生傳可也卽謂先生以詩文重以詩文傳亦無不可也先生撰述固根極於性天以發揮乎文藻殆與供奉右丞之詩之文其所由來相去遠矣所恨者寥寥數篇不獲覩先生之大全然白狐千腋不厭多而青鳳一毛不爲

少如文山有集備結撰之具體睢陽有詠傳聞笛之短章千載之後同一欽挹又何必存夫多寡之見也哉抑余又有感焉夫聖賢之學心學也卽游夏文學亦所云六藝之精皆歸本於道德而非馳騁詞藻之謂也自三代以下學者多驚浮華而忽本實工於雕蟲小技而昧於綱常名教虛文愈盛實行愈衰敗行喪檢而外假仁義遺親後君而口談忠孝學士無真性情天下所以無真名節也今觀先生諸詩詞致婉摯一往情深似與鐵石肝腸迥異不知古來忠臣孝子不過情摯於君父者耳先生有此一段深情

蔡忠烈公遺集 卷四
至性宜其有大不忍於君父者而成其忘身殉國捐軀就
義之本領也千百世之下讀者當自知之志璋於先生叨
同里閭而先生又與先君子同登丁丑科進士忝在通家
子弟幸得茲集悲喜過望因捐俸鑲板送置星沙先生祠
中以公同好以廣流傳云康熙二十五年歲次丙寅正月
穀旦溫陵黃志璋拜手撰

原序

志璋

昔薄宦湖南抵星沙瞻拜

江門先生祠宇廟貌

巍然覺精爽尙新因賦詩有嶽麓長盤浩氣住湘流如擁
血魂奔之句旣而愾歎 先生實產溫陵殉節之地有
祠而鍾靈毓秀之區無祠豈非缺典然私念秉彝之好人
心同然吾閩之祠不妨姑待於異日也因於星沙先搜採
其遺詩文序而梓之迨璋自隴右乞歸因訪求其嗣子知
遠行狀得諸友人敝篋中蠹蝕僅辨字跡伏讀再三覺筆
力高古渾健其於闡揚先生盡節罹難慘酷之事跡殆無

遺憾遂恭錄授梓復楷泉郡諸紳士倡建義舉今祠宇垂成矣其孫瑄又授余以先刻未載之遺詩及書啟數帙今先將遺詩授梓以續於前帙同星沙前刻之版並與其孫收藏其書啟再俟異日有心者協同續梓也嗚呼先生節烈昭揭日星固無庸復贅惟是吾鄉山川靈秀之氣鍾爲人物自前代迄今其文章科名爵位勲業皆與上國埒獨仗節死義之士不少概見茲因祠宇旣建凡學士大夫下逮閭閻之凡民瞻拜於祠下者咸有以激勵其氣節之思潛移其頑懦之習是吾鄉實藉先生以爲重也泉山若增

而益高晉水若濬而益深昏塞鄙倍之氣悉化爲日月光
明然則先生之爲鄉邦重也豈曰少補之哉故茲續刻遺
詩復恭述以附於卷端康熙四十九年重陽年姪黃志璋
頓首謹題

原序

稽古之傳人以人重匪以言重也人足傳卽不詩文何損如徒以詩文則亦詩人文人已耳余讀忠烈蔡公詩蓋不禁喟然三歎也曰嗟乎公之大節凜然照耀千古奚必以其詩哉卽詩亦奚必多乎哉先是崇禎末潭邑郭氏刊公詩號詩存郭固公門下士言詩以師存非師以詩存也知言哉詩僅四十餘篇對之若拱璧肅然起敬畏如誦正氣歌忠義自生固不俟復讀文山全集也公詩骨力峭勁衝口無凡近氣卽不多足珍矧諸體已畧備哉會劉生贊孟

持黃君北山哀集先後憑弔忠烈詩若干首索予序予曰是固然已公不有許存在乎盍以冠篇端若碑若傳若序皆有關公生平者與先後憑弔詩附於後庶爲大備黃以爲然爰授劄劄予惟蔡公大節赫赫昭著足以塞天地動鬼神扶名教其廟祀百世固當與李忠節劉忠毅共峙潭州顧公年最少死最烈有墓在孔道尤足以感泣路人較李劉二公似爲過之正不待讀其詩而後悲其人也然此特在楚言楚耳若天下後世聞忠烈之風復讀忠烈之詩其感慕興起自有同情則不以詩傳者亦正不必廢詩也

嗚呼古忠臣義士其不見諸詩歌而傳者蓋亦多矣而况見諸詩歌且垂諸史冊有若蔡公者哉黃岡胡之太序

悔後集原序

悔後集者江門蔡公所著詩也集刻於崇禎壬午正公司理長沙時其時郡國搶攘流傳未遠而鏤板寢失遂如夏鼎商彝不可多見矣梅今之爲是役也蓋緣外舅劉翁子正曾以制義愛知於公面贈是集歸而珍藏奉爲世守無何獻賊陷郡公旣殉國外舅奔竄流離集亦隨亡屢思再壽棗梨廣其傳以報知己其如搜索之窮何康熙壬午外舅過梅齋中適悔後集在焉見之如獲拱璧以梅小子可與言詩咏老杜自得隋珠覺夜明之句不自知其狂而欲

舞也嗟乎公之生平豈待詩傳卽公之詩又豈待人而傳
耶竊聞公之殉國也事在先朝郡中大僚俱護藩王後先
去公獨與總戎尹先民誓師守且戰逮先民輸款賊入遂
降公下馬整冠北面再拜臣不職惟以死報天子言訖爲
賊所得再三誘降公罵不絕口賊命磔之公欣然就戮罵
愈厲磔將死猶矻矻作恨聲曰恨不殺尹先民濫殺我百
姓重呼曰報得君恩顧不得母養寧殺我身勿殺我百姓
語過鋒寒日沉影痛忠哉烈哉蔡公眞可動天地而泣鬼
神矣公晉江人諱道憲號江門山進士爲長沙司李以崇

禎十六年八月城陷公年甫二十九靖難日上贈太僕卿
百姓感公忠烈祀公以祠今集重梓梅自攸江載至長沙
詩板藏之祠中亦見湘江遺民能愛戴忠烈於千載後也
楚攸後學彭廷梅湘南謹序

悔後集自序

悔後者何前日妄作詩今而後悔也悔後而復有集者何
吾但能焚前日之詩今日則且集之以俟後日之更悔也
嗟夫人生亦然寧惟作詩吾去年所見事自謂已至者今
年皆知其不至焉若謂知其不至者卽是自知何以自知
之後更復有悔吾見神仙拔宅之後應無甚奇特悔前此
不餐人間煙火也元白方自謂而主人翁出曰子能罷作
詩乎不能罷而又悔是兩勞也元白遂有斯集起於壬午
正月之五日晉江蔡道憲江門題

蔡忠烈公遺集卷之四

宗裔應魁肖梅編校

湖南新化鄧顯鶴湘皋原輯

鍾音貽雅

德彰永三叅校

梅後集總目

友蘭念香

詩上

有所思

偕元謨諸昆過東汝兄迎台閣晚挑燈小桃源分韻

得巡字

遊雙鶴山賦呈陳拙瑕師

感懷呈諸葛執叔

三里梅數村竹

白菊

菊雨獨坐

三山與林子野

同家元澹兄謁宋執節諸葛少保公墳登雪峯巖迷

林麓間久乃得路

寄盧皇授

仙霞嶺桃花妖豔口占一絕

春隄曉雪迴文

迴文和蘇薦卿

前一宵夢得芳草為媒嫁落花之句後一宵夢墮仙

家因續成前句

錢塘江上咏漁家一律

湖上重遊

舟晚見芙蓉共戲效六朝體

秋夜舟行望月懷砥庵廬舅師叔并柬皇授表

送年神曲呈北公廬舅師砥庵舅師叔

催梅花寄盧藝伯皇授二表

探梅

梅信

尋梅

賞梅

折梅

伴梅

踏梅

為王嬙毛奴解嘲

北上謁選留別諸社盟二首

留別諸葛士倫叔五首

登滕王閣

宿維揚天寧寺閣邸報太息者久之因步藏經堂見

牡丹盛開感成一絕

別廖孟符

夜月至東平州以兵衛行懷胡叔中

帝城元旦

楓亭別諸葛士年執叔

車中夢林子野答句憶得春來夢後二語續成

驛亭芭蕉

謁三顏祠於白石山

拜益相諸葛賓梅先生墓

午兩宿大龍驛懷諸葛士年父執開筭尋其舊詠得

秋怨二首

赤壁

雪堂尙在黃州府解之東雨夜不屐而遊求雪堂扁

纔失囑亭長幸存之

晚渡江風濤大作本爲送遠乃迷客舟口占四絕

江上風雨舟失復合同吳燕勒尹右五在倪伯屏舟

上

君馬元爲吳燕勒作

坐茅亭遲高彙旃督學晚得汝寧信

古松

送戴嗇存丞瓊州

自滄港泥行

泥山歌

步韻答林子野

寄勉許若木

次韻和若木三首

送王果玉之金陵訪何地部

史衲雲客潭州得其長公泮信賦賀

五日感懷步韻呈盧北公師

湘山楓竹

湘上行念林雨若歸

見雁懷人

雷雨歸雁

答尹尊子讀書禹碑山

蘇郎歸

率成寄諸葛士年叔二首

山賊戒嚴擐甲宿西郊安民二首

湖南行

尹尊子讀書衡嶽特為我來詩以答之

病中懷諸葛士年士倫二執叔

馬踏夜城望南皋燈火疑爲馮子根公郭子幼隗讀

書處

懷三山林子野林孔碩二同年

懷陶仲調

五歌壽周石拙同寅作

壽高督學太母六十

飲同寅石拙偶題其壁

鄂城寓中劉杜三函寄酒卮一詩奉答

桃花約不及期他去矣

通州不果行而老母已歸書愁四首

退食感懷

春夜率成送盧卓如煙翁歸里

獨居

憶前宵

張君章丈以十月抵潭州相見亦無幾開春卽言還

時事正亟別愁增之因賦七首

堵牧遊太翁嘗以湘水清長言祖我去通州後不果

行歸長沙牧遊以他事去荆鄂矣亦賦湘水清懷

之

四月一日詩

四月二日歌

壽同年李母六十

謝飛雲內兄來長沙四十日將歸不能言別以詩為

言詩率成其言真也

書扇頭送元昆兄歸舍別不歎遠冀相見勿遲

正夢在鄉園與吳張熙諸子遊而家信至起梳洗誦

李太白杜少陵詩至晚不覺感歎乃起舞作歌自

惟音節不在漢魏以下

題扇頭蘭寄盧藝伯

黃鶴樓夜飲惜別

和張秘書

武昌九日懷人

寄元燕弟

鄂渚望月

昨夜月

送堵牧遊太翁入觀歌

又歌

龍岡書樓口占

移居河上故人多贈以詩廿二日羣集小齋蘇薦卿

許以夜宿步韻諸故人兼語薦卿如約

如韻和林孔碩

口占惜別併祝薦卿若木

留別

莊江贈胡叔中

光澤守歲席上分鴨字

又一首

清湖邊上

許若昂張清奏皆余所先得友時俱在廣陵守幕中

不可相面感至愁生時讀離騷以忘愁雨中來不

絕乃狂吟拍案起二首

許若昂在家時曾夢與余相遇于一官署及余偶有

維揚之行若昂為維揚守賓客若昂之夢遂驗也

感成一律兼呈太守吳先生

序張母苦節行

行自芍園歸所思頓發念向與王果玉采花梅莊下

興致頗異因寄與之

答余朗生餽魚鱠

東蕭羽仲

別朱王孫

倚綠玉而思乃雕新篁為之留別

荷亭留別廣陵諸子

歸棹松江縱覽天半搔首此身作遊客也鄭冲素索

詩走筆贈之

次嘉興鄭冲素將別請作一詞呼筆墨立與之

南歸懷胡叔中許若木

自文圃歸輪山和王果玉

飲史衲雲梅園

卷五

悔後集總目

詩下

楓亭賦別

辭林子野邀飲

與胡叔中

與吳元圭

與許若木

失題

贈餘杭主人王仙御

逢吳女

夜月酒歌遠客熟妓也友人遺整腰紅錦至為紅紵

續白歌以試新聲並謝

題小素美人扇頭

長安夢中得詩

長安元旦

答李金吾步韻

衢州舟中晚懷歸路

失題二首

齋中卽事

失題

失題二首

壽林我靖伯六十六初度

贈墨卿

春日輪山道上

己卯寒曉入山訪諸葛三叔

歸飲諸葛叔齋頭

庚辰中秋讌繡香園

北上謁選畱別諸葛士年叔

建溪舟上與果玉言諸公霜月下必能相念因共步

子野韻寄歸示意

越浦第一日與果玉同賦

題旅舍盆花

山路隨溪倏然萬狀層波淺雪閒葉深花雖有同心

尚多殊遠入山第二日賦

轉入山幽處

四度仙霞嶺皆雨

蘭谿壽王果玉

與王果玉遊西湖同賦

庚辰五月遊湖六首

自雒江至西湖與同行者三四別今到塘西而果玉

又欲去我因吟林子野詩有一天好月人方去滿地秋聲感可知之句殊難爲情矣書一絕於扇頭俾攜去長吟可也

有之淮上訪吳皜菴者詩以寄之率成武林山下

青浦寄家中諸友

念同社諸君獨余與雨若北風驅馬艱苦萬狀

梅花相逢行

聞從者歎

辛巳北上補銓到汝上謁閔子廟

都門留別諸同年

東齊馬上口占

驢背自吟

明日過星沙夜飲別諸葛叔和韻

惜別更留呈諸葛叔

別詩步諸葛叔韻

別元哲元謨阿昆季之長沙

楓亭和元燕韻

無意山麓閒得佳麗

再和薦卿韻

建舟新月懷諸知友

溪山瀑布泉

失題

踏沙歌

沙上薜蘿花

七夕署中同吳叟熙夜飲感懷

秋月同薦卿叟熙若木步城頭觀江湧

未至困水十里許一澗自兩山間流出幽不可極又

不可徑薦卿笑謂余曰吾他年結茅茨其間子來

令椎髻婦爲子作麥飯也因樂甚作歌余起舞之

清夜卽事聯句

壬午春有督漕之行寄飛是舅

督漕寄懷史親翁

寄元聲元鼎阿昆季

寄元漢兄阿昆季

史親翁顧之十日卽言別賦此鳴感

唐孃子輓詩二首

失題二首

寄東汝兄

送飛雲歸里雨若拈五字為絆率為之

關山去郡南五十里為迎官長則宿焉人家小樓稍

潔可憩嫌其窗戶不寬咏懷亦塞再至呼筆不能

無情

失題

為蕭雪文秀才作

為江者世兄作

寄林雨若

寄君章丈

壬午感近事答人

平生離別不能下淚冬夜黃守臺召飲反向街頭念

雨若將歸不覺涕零從者滿道以袖自乾耳至署

口占一首

入鳳山見兵曹朱伯宰話長安事為之憤懣流涕因

成一律寄江上諸子

塞上愁二首

北堂

湘山走馬迎人也

渡江風湧口占

送同寅周石拙之攸

滌江道中作

句

詞

已卯孟春九日親友集於龍卧處長者出絹徵書因

調南鄉子

寒夜引調長相思

失題

南香子

鷓鴣天

長相思

如夢令

風入松

賦

月初生賦

文

君使臣以禮

二句

君子欲訥於言而敏於行

譬如為山

一章

愛之能勿勞乎

二句

民之所好好之

三句

序

周伯孔楚寶序

郭金臺代古詩序

悔後集自序

送堵牧遊入觀詩序

書

丙子會試寄兄書

與某書

植元

章德

德彰

宗裔應魁全捐刊

鍾音

德佳

友蘭

蔡忠烈公遺集卷之四

悔後集

湖南新化鄧顯鶴湘皋原輯

晉江蔡先生江門著

宗裔應魁肖梅編校

鍾音貽雅

德彰永三叅校

友蘭念香

詩上

有所思

我意存高尚披褐欲入林無言與世隔去去乃山深雲氣
封芝草秋花多苦心渭水隔悲響虎豹嗥且吟可有采藥

者杖屨坐幽陰相送亦何道白日忽西沈
灑露交叢薄月色挂遙岑山水自淒寂
豐腴在好音飽盡竟一曲騷屑良獨任

偕元謨諸昆過東汝兄迎台閣晚挑燈小桃源分韻

得巡字

南北相過莫厭頻秋衾夢染白雲新何如小閣一尊酒迭
作名山兩主人醇醪只爲公瑾醉寒花應著阮郎春殷勤
石上栖燈火數尺亭溪遶幾巡

遊雙鶴山賦呈陳拙瑕師

偶然杖劍出煙霞石上何年籠碧紗別去親知忘甲子到
來巖壑又秋花千春邂逅詩猶在雙影高寒鶴未斜更上
諸山最絕頂芙蓉海色是吾家

感懷呈諸葛執叔

匹夫生田閒南畝力可竭胡爲厭貧賤功名如麵槩勞勞
百年身事人三寸舌管樂冢上碑苔花字已滅運會在須
臾所思不可掇須髯怒無言動作經春別俯仰眞奈何中
夜懷冰雪悔便語初心只今愧賢哲天地爲混沌人愁無
斷絕下帷拜古人爐煙燼復熱

三里梅數村竹

舊刻作三梅村數里竹

十里濃栽竹孤村故字梅江頭少醉客石路已生苔無意
知年月何人偶往來語君勿孟浪隱士亦須才

白菊

風霜首此花經時意云屬皎皎雲輕陰日暮闌干曲明月
殊未來高枝相對矚願子惜素軀天寒最軟玉

菊雨獨坐

望爾香力厚嘗懷經歲心風前多別蕊丹葉亦辭林千里
想容輝對之獨撫襟不識栽者苦雷雨戀秋陰花自無愁

色但罷主人斟既謝脂粉質爲意不須任並坐作相思報
子在霜深

三山與林子野

乘舟方到市庶可見君顏別爾動經歲生吾隔數山何須
煩造化如此置人間長瘦坐相憶秋深語月還

同家元澹兄謁宋執節諸葛少保公墳登雪峯巖迷
林麓閒久乃得路

虎拜先賢露未晞青楓白馬黃金鞵樵眼有路無心得僧
老何年帶雪歸秋色一江分客供暮雲千里落書幃層樓

猶爲高未極片石峯頭好振衣

寄盧皇授

英劭如君何激昂時觀潮汐議行藏氣通帝座去三尺胸
列雲霞盈七襄特樹令聞今陸子徧交名士又周郎懷人
遙託無他願兵氣銷爲明月光

仙霞嶺桃花妖豔口占一絕

嫵娜紅粧整復斜東風日暮嫁誰家小溪深隱漁郎拙笑
向春前染紫霞

春隄曉雪迴文

孤村一夜雪漫漫白盡沙隄春惹寒途滿玉花梨落蚤鳥
啼隱處曉霜殘

迴文和蘇薦卿

雲染半山玉是家夢成欲退曉霜斜醺醺尙憶低聲笑君
似未容夜看花

前一宵夢得芳草爲媒嫁落花之句後一宵夢墮仙
家因續成前句

踏碎春雲乘晚霞只憑明月識卿家可憐酒溼臙脂嫩芳
草爲媒嫁落花

錢塘江上詠漁家一律

家在長安裏煙波何處村撥花垂細餌剪竹結斜門臥去
月千頃沽來酒一尊逢人埋姓字恐有哀王孫

湖上重遊

十日湖中泛一回人間無事宴多才山公騎馬應長醉西
子糴糶爲更開何處相憐私晚棹向人不語只銜杯華燈
涼月爭深夜尙有墜鬟認綠苔

舟晚見芙蓉共戲效六朝體

步草愛將夕得蓮及未風逸民深自遠羞女避難工秋被

宜全碧晚粧用半紅欲知憐惜處取照綠波中

秋夜舟行望月懷砥庵盧舅師叔并柬皇授表

容易分攜葉又紅相思異地將無同千山寫照望中月一
紙淋漓別後風遙憶霧溟深豹隱現知海僻作漁翁君家
自是生金穴新發龍泉氣似虹

送年神曲呈北公盧舅師砥庵舅師叔

官衙羯鼓太平搗玉火飛煙墜紫霞青天何處汝爲家元
雲歸去道路賒煮雞煮雞拜堂下酒澁霜濃杯不瀉更移
瑤席剔銀燈夜深香沸春初嫁

催梅花寄盧藝伯皇授二表

催梅花老我思殷勤舊月照南枝雪中草木皆隱伏豈是
卿卿高臥時酌清酒聽吾歌雪重千山奈愁何寒松不解
文章事太古風流懷子多

探梅

千年風雪認前身白眼相看何氏民冷落不須通姓字蕭
疎別有隱精神莫將明鏡羞花面輕斂塵衣避玉人頗憶
舊時攜酒處一株斜照古城闌

梅信

美人無信至使我立寒風何處寄相憶家住嶺頭西家住
嶺頭東

尋梅

霜衣薄暮更遲回何事瑤樓銷不開且過茶花應得意牆
西報有梅風來

賞梅

瘦到花開亦漸胖南枝徑放北枝繁嶙峋若在終難狎顏
色新成似可餐叔夜有時山中酒廣平止合鐵爲肝年來
不盡杯閒話對爾無言但整冠

折梅

對卿臨欲去去恐復來思隨子折相送常如花下時

伴梅

青山成獨望始念梅花孤稍得身無事但忘酒一壺乾坤
惟抱膝爾我已長須肯放石牀臥樂天第幾圖

踏梅

聞風山上佩環聲流雲西去愁不行玉篴只吹人間曲不
管湘娥夢未成漉漉月上青天去欲向瑤池歸何處雙成
臺殿已煙深玉蘂香驕風滿路

爲王嬙毛奴解嘲

美人顏色本自知况是明妃未嫁時塵土黃金尙不與安
能持貌向貌師毛奴雖工不相識欲肖明妃那可得誰爲
天子畫和親但說丹青罪誤國明妃不幸奴亦冤何須上
馬寂無言一代公卿相對成奇策無使君王獨厚女子恩
胡沙粉白漫浩浩飄落桃花等秋草漢宮日暮掩羅衣幾
月娥眉昭陽老縱有黃金畫亦俗俗師美人但畫肉宮粧
偷寫到人間一幅燕脂易斗粟不如明妃嫁與大荒西世
上貌師無處下品題

北上謁選留別諸社盟

十年粗窮覽四海不多人中原方鼠鬪龍伏大江濱安知
聖主意久已屬隱淪終當各萬里無爲笑風塵涼秋霜滿
野我行良苦辛壯夫恥別淚含意醉經旬生平未報德努
力愛君身

長安經行路紅葉曠秋聲遲我三日雨別酒動江城徑復
就君飲中懷欲自傾長嘆亂心曲蘿月淒已明雖知無所
達且亦坐深更去去天之涯誰爲數交情豈無新知歡詩
酒浪得名向君求一語聊欲志此生

留別諸葛士倫叔

欲別似應別愛君未語君青山欲送客容易起秋雲
我意雖存劍安能不憶家憑君千古誼熱酒破春華
停車非問路爲飲故人杯我去若風雪莫登相望臺
所欲與君語君懷想自知抱膝花下坐但數來歸時
京洛多奇士慕君自有人我持雙筴去微檄徧南津

登滕王閣

閣上愁成帝子篇王郎今去已千年斷碑有氣生春草古
瓦無痕繡紫煙江月應沾前代酒天風誤送幾人船古來

狂醉功名薄獨酌空波夜雨懸

宿維揚天寧寺閱邸報太息者久之因步藏經堂見

牡丹盛開感成一絕

北望京樓不忍登牡丹庭院第三層近來富貴學清隱似
此名花對野僧

別廖孟符

一棹廣陵路幾千楊花作主挂榆錢祇應故里桃花盡笑
我春風負一年

夜月至東平州以兵衛行懷胡叔中

野寺鐘遲動早鳴旅心無定月東斜雙眉梅蘂寒堆雪一
劍芙蓉靜著花劇孟不來終下客子房何日始爲家殷勤
繫馬加餐食人在池塘夢聽蛙

帝城元旦

於皇天子肇王正宮漏初收玉燭明五夜天將分萬戶九
霄霞彩落變成雷聲遠遠青陽布霜氣徐徐皎日輕獻頌
於今逢十載聖明鄭重奏昇平

楓亭別諸葛士年執叔

功名士論亦羞稱此別瀟湘異五陵知己何須勿語短逢

人無計可逃憎君心澧浦安能隔客面江楓已數層勉把
滄波爲止水世閒笑口裂鷗鵬

車中夢林子野答句憶得春來夢後二語續成

河間二月不飛花錯認東風拂袖遮馬入孤村煙漸破人
迷長陌柳爭斜春來到處皆酣酒夢後何人不憶家未識
長安今近遠黃昏更渡板橋沙

驛亭芭蕉

芭蕉亭午有餘清片片皆能作雨聲幾段離騷猶強記偶
然放筆已書成

謁三顏祠於白石山

立馬踟躕荒路口青是苔深紅葉厚悲風數里穴松杉顏
顏能傾虎豹走白石當顛如拳猊吳工新琢水晶鈕其下
古貌塑三顏魯公之左常山守季也孝子亦須眉案有黃
雞村白酒我問此山廟何爲屢易斷碑神已久水有蛟龍
陸有盜吾民賴公伏九醜當時古柏有二株大者自燒雷
火吼嗚呼戎馬暗天時已辭臣身名何有天子不知何如
人多謝老翁今爲壽

拜益相諸葛賓梅先生墓

蘇忠烈公遺集 卷四
種樹山中雲易昏松花落盡未開門梁王苑囿思賓客丞
相桑田長子孫東嶺遙分鷺翻勢前村不斷馬蹄痕先生
終古畱何事冢下耕人已結村

午雨宿大龍驛懷諸葛士年父執開笥尋其舊詠得

秋怨二首

山雨勸我宿黽勉僕夫詞夜長春正苦晝睡豈相宜四壁
桃花暗煙水共迷離呼童勿憚煩索我故人詩秋怨第一
詠迴翔慘澹思兩人嘯坐起各各有須眉其二又愁絕肝
鐵老媚姿亦如青飆暮雷雨別君時羣儒數十解我心反

覆悲當其有所感人生豈自持痛飲高吟者亭下屨相追
無書復罷酒對君當爲誰十年抱區區辛苦嘗自疑此意
終愚甚不敢令君知

赤壁

當年虎豹客愁攀今在人煙秋色閱勢壓江流欲到水身
行壁上更無山已開樓閣爭題詠未翦荆榛誰往還且向
亭西竹下去東坡居士一生閒

雪堂尙在黃州府解之東雨夜不屐而遊求雪堂扁
纔失囑亭長幸存之

東坡爲雪堂不攜雪堂去今我來黃州尙識東坡處風雨
滑莓苔秋燈不肯曙四壁何蕭蕭獨尋亭長語雪堂二大
書東坡手自署勿爲貪者得遊人不得與

晚渡江風濤大作本爲送遠乃迷客舟口占四絕

送客身方客我愁君不知故人情草草止爲將歸時
大江暮十里中有雪山開我念君先渡放膽隔江來
千檣塞漢口無處識君舟角聲西北起獨上望高樓
十五日正滿寒風吹我衣今宵猶未別不可夢君歸

江上風雨舟失復合同吳燕勒尹右五在倪伯屏舟

上吳尹二公
爲倪門人

曉風東去晚風西一幅練波不自攜未有前期安可別欲
尋舊詠已無題雙流竝出漢江小滿袖新籠楚月低我亦
於君舟上醉同年可與門生齊

君馬元爲吳燕勒作

君馬元臣馬黃臣馬不及君馬良君馬遲臣馬促臣馬踟
躕讓君足歧路去東西君行慎馬蹄不信觀臣馬霜花破
蒺藜莫悲松錦長城下漢上青燐棲殿瓦驕駟帶血獨生
還不見將軍歸戰罷誰爲君馬秣生芻鹿門山中草亦枯

古來隱士避兵處盡資今人作霸圖祇是英雄心未死冢
中兵氣沈秋水何勞仰面問蒼天功成不成止如此君馬
自長鳴臣馬嘶無聲明河各回首炯炯照平生

坐茅亭遲高彙旃督學晚得汝寧信

君豈憐予衣上塵偶然坐得一閒身可攜酒榼迎官長欲
折梅花問主人北去瀟湘須到海南來車馬未通秦參軍
新獲汝寧信只恐近時消息眞

古松

江夏湘陰八百里古松夾道千萬株共雪同霜等顏色細

觀意態各自殊龍性正直無小技蛟螭多怒相翦屠亦有
生當萬仞壑墜石吁嗟賴爾扶悲吟不識風雨心衆濤竝
瀉安敢孤我見白門好事者所攜吳興松雪圖不過此中
體之一已謂奇絕古今無豈知天地隱靈姿鬼神耳目亦
易愚欲就羣材苦相索天寒勞汝太區區

送戴晉存丞瓊州

一泓杯水一行煙指點瓊州在席前君去不難風萬里人
來應寄字經年元龍湖海堪高臥士稚中原未著鞭笑取
吳鉤雙鏤約相逢強半在燕然

自滄港泥行

蚤發楊柳津午陰不數里奇險困舟車馬肩相角抵昔日
神禹功勞苦今在此棄捐尋常徑危柯伸紫藟艱難氣亦
平漸與峯巒起新火出林皋旅徒顏色喜桃花俯如飢春
愁寂無倚美人來高山日暮傾卷耳遠道不相知豈無石
上趾

泥山歌

楚山一雨泥深數尺呼
之泥山有感而作歌

止云蜀道不可攀無人解說封函關青天有路行終到滄
海欲桑渡實難前日何日激使蛟龍怒至今萬物在泥蟠

塘坳陂池亦自可陸沈正在最高山我欲東歸惜羽翰黃
精不熟豈可餐爲此崎嶇之往還不忍飄零誰家子爾爲
龍鬣血未乾下田宜蒸上宜漑地力豈須皇天代何不伐
取青松作長橋白石離離無腥穢直驅牛馬通河內無數
英雄苦用心一尺春雲成草昧鄭家婢子背毛詩問我張
眸總不對

步韻答林子野

芙蓉根幾尺江水無盡深人生百年中勞苦感升沈時務
在俊傑孤懷往自尋無意一邂逅清風吹我襟素私誠云

蘇忠烈公遺集 卷四
足夢寐但至今豈敢謂人面不改如其心經時始相見長
須佐苦吟相見亦何道良勝思瘖瘖賤軀已負重離愁不
可任所嗟天下士伏處白雲陰干戈滿四壤君何愛一琴
應望星與斗躊躇步空林若能一相思中夜起清音

寄勉許若木

汝歸膝上有琴橫十丈芙蓉霜月平縱有秋思因我發慎
毋狂醉使人驚英雄不席三公籍牛鬼虛號一代名只好
安貧多慕古髯公終不負初盟

次韻和若木三首

飽我平生一部騷瀟湘何物醉秋曹雙憐鶴影青天瘦各
選蒼苔立九皋

遂負腰肢折五紵故山豈減洞庭過十年應悟人間事空
撲春花上紫羅

將軍新去脫官袍悔不當年學豹韜似爾空山夢夢好酒
狂鍛鐵未爲勞

送王果玉之金陵訪何地部

且攜劍去不須疑龍在深淵鳳在岐謂爾天生終有用問
余世法則安知青山足見古人面白眼毋題公子詩三度

月明歸可得梅花人瘦倚霜籬

史衲雲客潭州得其長公泮信賦賀

渺渺思公子兩懷兩不知春音到楚日醉我逢君時交道
亦傳世文章今在茲還家荔酒漬龍沫動秋池

五言感懷步韻呈盧北公師

桂楫蘭舟桃葉肥石梁餘地舞羅衣肯教汨水龍爭飯未
忍鍾山鶴入幃李廣生還誰裂土王嬙西嫁不稱妃中原
何處無鞞鼓共向江頭買醉歸

湘山楓竹

一作湖
上感懷

曉雲不爲此山開楓竹離披靜可裁碧玉愁多難著酒
脂染誤不糴梅山中尙有眠初起歲莫僅容春薄來欲剪
東湖波一片故園雪後印莓苔

湘上行念林雨若歸

宿霧卷大山浩然滄海色中有無數峯奔騰不可得我欲
登峨眉披雲幾千尺下指望林皋煙點梅花白踟躕念天
寒尙疎遠行策昨日鷓鴣裘已贈思歸客

見雁懷人

蜀水初來雁影新蘆花不肯厭秋貧瀟湘此去無多路未

有沙鷗作主人

雷雨歸雁

秋聲已老尙聞雷獨雁橫天放膽回只道江湘書已溼故人風雨夜登臺

答尹尊子讀書禹碑山

蹴碎嶽麓雲翦斷湘江水楓丹染院深秋老菊衣紫竹露垂朱霞霜華拂劍齒聞君多苦心中夜常數起敲火作長吟山鬼驚偷耳書持寄素心虹伸吳縑裏蚤晚欲行尋山顛讀奇字

蘇郎歸

蘇郎歸小妹解劍大姊牽衣一雙瞳人分顧盼異鄉水土不能使郎肥自郎之出掩容輝蓮荷同藕復相依細推物理毋相話亦有經年不到闌近來好事許若木曾否君前說是非西家鷓鴣大無威終日斂翮不他飛但聞戶外聲聒聒不敢牆頭摘紫薇美酒尙存親戚稀松粉金團餌郎飢輕寒薄倩桃花園今宵且莫煩郎語月明爲我話湘妃

率成寄諸葛士年叔二首

時叔有莊生之嘆

兩家相別後但願各平安已畏君常瘦不圖花又寒私恩

孤豈易大善繼終難淚莫隨秋盡遲遲借影看

時事今如此非叔安敢言干戈尋衆起名節抗孤存羞歷
歲終俸傳餐日一門平生無善策長嘆草茅尊

山賊戒嚴擐甲宿西郊安民二首

依依江柳暗春城鷺鷥池頭鼓角聲莫取巍冠照馬頰封
侯自古少書生

鐘聲薄暮隔江來付爾愁心一片回若道前山宜伏甲李
邕碑下踏莓苔

湖南行

江北豺狼滅無期湖南父老不勝悲得免干戈亦幸甚盡
輸賦稅安敢辭欲畢一言官長怒近來不比十年時秋田
喜熟憂穗短米價暫低高復隨水少魚腥山貴木此事往
往令人疑貧人辛苦在南畝徭役追呼亂所爲富人愛金
不愛田買田雖賤費不貲大差十歲如轉眼死生兩別不
相知富家有田旋復棄滅直吞聲淚背垂只今如此勢漸
極荒草誰耘飽王師市人不幸養官馬生涯飄蕩門亦卑
本是男兒口中食屈身事馬患馬飢手拱金錢心嘆息遇
人艱難吏勿答前日一程賣一女今日一程當鬻誰脫棄

親知辭鄉縣行行中復有所思夜半歸來見妻子啼哭毋
喧將遠離官差尙在西家宿歲暮天寒汝何之但願先驅
羣鼠雀蚤供惟正安鋤犁

尹尊子讀書衡嶽特爲我來詩以答之

嶽雲未隔幾重山君渡湘江費往還識面何須心便苦多
情自悔夢難刪千家雨後花猶溼一片霜中石已頑爲我
躊躇峯頂望薜蘿有路總應攀

病中懷諸葛士年士倫二執叔

病體罪思憶相酬未肯疎一春翻舊夢八月斷來書時事

天何甚君才我不如直須龍鳳出水鏡欲潛居

馬踏夜城望南皋燈火疑爲馮子根公郭子幼隗讀

書處

好月霜難下高城獨馬看遙憐山影外人在別燈寒

懷三山林子野林孔碩二同年

未能忘爾此區區初下微霜夢到無自以舟輕藏我懶不
妨雲倦請山扶人家種稻在空壁吾意學仙非別圖數得
相思題葉寄丹楓應已落三吳

懷陶仲調

別後不愁秋不清瀟湘分去月中庭十年曾諳相思面今夜誰知獨語情雁字可曾加翦刻花枝太苦未縱橫慰君畢竟持何事書老寒燈漏報盈

五歌壽周石拙同寅作

長沙春酒熟上客待君邀自來自醉別有武夷山上樵毋食我蛙使我瘦毋食我熊使我驕芝草有花黃精有苗汲取瀟湘之淥水不用箕山許田瓢一曲松風響玉簫我亦有酒奉君杯一酌再酌君徘徊黃公壚畔隱天才吹簫人去今日回嘈嘈四壁聲如雷留我中庭數尺苔雲屏

小鶴向君開迎得風來雨亦來

君之亭兮綠槐下一幅春聲不愛夏十里青山隔杖頭水雲入戶收平野長生爾我各自知句漏丹砂亦易假君不見眼中司理溼青衫半日齋中十日馬

滇池不可到使我來長沙

憲初授大理司李周公滇南人

畢竟見君亦有

時換我溪頭芙蓉花人生出處殊不易一寸區區十年事今日君親已報恩請放胸中無限地五月江寒菖蒲翠勸君卮愛君不復爲君詞歌君曲魚子蘭花香酒綠黃石山人橋水東皓眉亦作烈士功螫龍羞老草木中忽然爲

君動顏色明星萬里一雙瞳

壽高督學人母六十

憲也手持海上珊瑚枝以壽明公太母之六十公言此非
老母心沉芷湘蘭皆不挹我聞此語逡巡立何以壽母拂
長箋自識明公知母賢海內操觚才十萬爭投錦字沸尊
前何以壽母將進酒歲歲花多勝楊柳長安祇羨黑頭公
誰似雙親未白首又何以壽再一觴人生親健遊不妨况
是衡文報聖主過家恰好日方長光祿太翁周甲子向隔
吾家五千里請更爲翁進一觴所欲壽翁亦如此同醉同

歌同福履

飲同寅石拙偶題其壁

萬宇欄杆一字無如君對我捋長鬚中原別有關心夢消
得瀟湘酒半壺

鄂城寓中劉杜三函寄酒卮一詩奉答

杜三去我遠安得有書來我宿春山下詩函向月開長鯨
猶布雪小鳳未梳裝此日應難醉何勞寄酒杯

桃花約不及期他去矣

小桃果果未曾開我去通州君未來縱得相逢非舊約平

生錯把別時杯

通州不果行而老母已歸書愁四首

遊子仍在楚老母已歸閩尙問通津路曾行南北人夢中
非定處別後見何因僅有三童僕持書去苦辛

北堂歸可到姑姊暫成歡數得全家在方憐一子單若能
堪此別初意願爲官分汲長江水春風各自寒

向因官舍窄買竹架房櫳未暖一朝席虛糜兩月工老姑
將婦去春信寄人逢獨臥南牀燭他幃動晚風

清湘作美酒米貴力難齊吳雪三罈菜蜀梅幾甕醢臨行

與老吏歸去飽其妻此物吾何惜慈親手自題

退食感懷

旅亭錯認是吾家躑躅無聲照碧紗種菜已抽三尺筍培
桃爭落一庭花此閒老母應頻夢獨自傷心在散衙記得
春前爲別語歸來慎勿久長沙

春夜率成送盧卓如煙翁歸里

春燈照別酒未敢語中懷客路行終到吾生未有涯音書
來翼軫荆棘在江淮白首君自愛何時醉小齋

獨居

十日不出郭浪花忽已清江空集萬象相與感平生我來
仕長沙薄宦學將成官衙食芝草不能毛骨輕既貧無清
夢豈非猶近名應勿多追悔且聽江水聲

憶前宵

問爾情癡酒一斟長宵何事苦沈吟忍言衣帶佳人遠已
隔瀟湘秋水深南浦芙蓉愁獨影西陵風雨妬同心闌干
倚盡相思曲歸去月明遂至今

張君章丈以十月抵潭州相見亦無幾開春卽言還
時事正亟別愁增之因賦七首

君來已幾月我憶是初冬近事皆如夢夜寒待曉鐘
長沙已如此山水受君知白雪春方下不應爲別時
君去二月到我園徧桃花莫大思家急歸途酒旆斜
我已來二霜敝我芙蓉裳故人誰相念久客厭江湘
尙有遊人在數月云蚤歸此閒寒無絮歸去脫春衣
二百年此地未嘗見甲兵吾猶書生在緩帶宿江城
誰爲君歌別此別爲君歌已渡西江水君懷似我多

堵牧遊太翁嘗以湘水清長言祖我去通州後不果
行歸長沙牧遊以他事去荆鄂矣亦賦湘水清懷

之

湘水清紫藤花老鯉魚生使君歸來飲此水蛟龍汝引兒
孫行君歸奈何遲夢君不似別君時一宵魂氣猶如此百
年變態安可知送我通州君嘆息通州欲去去不得前日
君行誰送君使我江頭望顏色丈夫飄然七尺身今作蛾
眉誤嫁人鏡中歌泣鏡中笑砍斷青銅千餘春湘水清清
可掬脫君白霓衣自挂湘妃竹岳陽樓下好東風縱不相
思歸亦速同爲湘水吏不知湘水深人生各努力願君放
我歸長林

四月一日詩

壬午之年四月一我之先君初度日人間痛飲花甲週泉
下一杯未可必嗟哉人生曾幾時無情歡笑無情悲六十
年中半未識雨雨風風帶別離離人猶望風雨秋此別何
須再登樓若忘曩日將歸路豈復生前問短修三生之說
無是理前身後身父子耳一子春袍草始青一子瀟瀟渡
湘水但觀往事未甚然今日何日來何年仙山誰劈麒麟
脯且食兒孫瓜果筵臣實有罪病臣身為吏四體屬旁人
兩袖未乾東向淚朔日又當拜明神定知如此非親意五

鼎恭承天子賜夢中似云想藜羹蚤晚歸來自荷簣

四月二日歌

今日滿堂賓客爲親壽獨有天涯遊子坐清晝滿堂共抱
千里心不見天涯遊子淒淒瘦遙憐小院綠花深前歲花
開今歲又大婦數客備酒尊中婦手燃鑪煙縐三婦雁行
思遠人帖帖春衣隨嫂後其間拜跪不能齊學禮諸孫皆
尙幼歡呼不聽老人言老人自謝蒼天佑耳後明珠六十
春時與隣家時復購唯有太平夫不還萬歷風景難依舊
白雲在天出山岑無數歌聲低舞袖舞袖空勞碧玉衣天

涯遊子未得歸遊子未歸且進酒歌一聲滿堂賓客盡回
首

壽同年李母六十

李母太參之季女二十餘時寡李家生以其姑老以子春
風三十度落花而今六十子貴矣疏請旌之帝曰嘉可見
節義皆如此人間茹苦莫咨嘆

謝飛雲內兄來長沙四十日將歸不能言別以詩爲
言詩率成其言真也

吾已厭斯地不堪遲汝歸常生別後夢猶著來時衣遊子

未同里慈親各在闈我家必問訊何事寄書稀

書扇頭送元昆兄歸舍別不歎遠冀相見勿遲

去年九月八日相見正在長沙今年七月方半兩人一人歸家飄零尙乃如此何時同植桑麻堂有白髮老母鄰有穀麥可賒歲月與我共此辛苦何似天涯入門且自歡笑賓朋無酒亦譁問我近年何狀春山徑寸粗茶

正夢在鄉園與吳歟熙諸子遊而家信至起梳洗誦李太白杜少陵詩至晚不覺感歎乃起舞作歌自惟音節不在漢魏以下

吳練製短衣霜雪不如素百萬在青樓饑寒不如故明滅劍靶刻舊思悲風又撼荆卿墓

題扇頭蘭寄廬藝伯

熟徧荔枝樹底紅小樓斜透碧梧風無端午夢思公子寫盡春蘭寄驛筒

黃鶴樓夜飲惜別

綠蘋鸚鵡認何洲有酒便澆黃鶴樓縱說相逢無舊約可能別去不生愁似遲明月來深夜已老江濤動晚秋欲進一杯君徑醉隔櫓自望水西頭

和張秘書

小臣未敢策治安一春化盡楚江蘭何須古壁重增壘可
信今人易罷官名士止應談魏晉君王久已厭申韓仲仙
樓下遺雙戟招得詩魂淚亦殫

武昌九日懷人

楚江又過一重陽不在長沙在武昌學醉休評惠酒好懷
人如待菊花黃三秋客意皆憐水一片山容不受霜只就
近城何處望親知誰到北山堂

寄元燕弟

元燕近何似作書憶汝書畫沙豈有態坼壁亦嫌疎我在
武昌久心懷濠上居安能靜夜夢相見果歸余

鄂渚望月

故鄉無此月或可免相思初別心猶彊近愁夢不知天寒
低白首夜靜斂蛾眉恐依前冬想梅開我到時

昨夜月

自合客身伴月行急眠止是爲愁生不知樓外梅花樹獨
與徘徊到幾更

送堵牧遊太翁入覲歌

十月迎君南十月送君北一歲雙酒卮隨君變顏色誰能
入長安便無古人憶下有洞庭上湘江爲我留君不可得

又歌

已出湖中風西水東大江水與黃河通黃河水溢蛟移宮
近日穆陵關上路行人徘徊開角弓長安馬瘦步不工君
在南君在北夢相思見顏色他鄉飯君強食歌再歌中嘆
息

龍岡書樓口占

水流花多落春歸燕獨來牆西人不見煙雨上高臺

移居河上故人多贈以詩念二日羣集小齋蘇薦卿

許以夜宿步詠諸故人兼語薦卿如約

雄劍匣移斗酒開青天望爾白虹來元龍若訪並頭臥地
上何須百尺臺

如韻和林孔碩

相識豈非面何言異淺深人各好所歡我思嘗獨沈固知
君去我高岡千餘尋懷想成親舊如在帶與襟悠悠何年
代中誰劃古今蘭皋萎宿莽芳草愁人心日夕鼓山中虎
豹悲且吟所欲與之語片石不得瘖今時惡知士可者重

其任君豈能樂此未雨戒秋陰冷腹可澆茶雖貧不賣琴
何以慰所思一幅墨雲林英雄須靜理餉以山水音

口占惜別併祝薦卿若木

別意畱戀清酒催廣陵春去幾時回月明千里相思路先
人秋風平遠臺

畱別

芙蓉寶劍杏葉蘼楊柳煙多草似錢若到剡溪春水綠思
君一夜別經年

莊江贈胡叔中

仙郎何事謫人間天上寂寥故買山海氣侵書秋色冷夜
來花筆夢難關

光澤守歲席上分鴨字

壯士長歌露秣恰百年王氣春爲甲夜深盃爛爆聲傳歲
度驚飛沙上鴨

又一首

舟泊澤畔心緒惱席上猶剝八月棗春風忽報新消息卻
將人間舊塵埽

清湖邊上

雲倦壓山山嘗瘠春波直下幾千尺西望平橋宿誰家滿地花深無行迹

許若昂張清奏皆余所先得友時俱在廣陵守幕中不可相面感至愁生時讀離騷以忘愁雨中來不絕乃狂吟拍案起二首

離騷讀罷又離騷芳草無情下女蘿見說二姚新事主瓊枝自佩過江皋

吳江楚江幾千里中有幾人似吾子紫霞長佩雜楚花古龍夜跳燕磯水揚州女兒索短歌霜老春寒捧絳紙長虹

滿引呼青天劉伶于今有酒否綠楊無奈下江干長條繫棹短繫鞍但念吾面碟子大他年不用仔細看

許若昂在家時曾夢與余相遇于一官署及余偶有維揚之行若昂爲維揚守賓客若昂之夢遂驗也感成一律兼呈太守吳先生

不見容輝想靡他人生有夢易經過君從雪後遊津剡我自春前翦薜蘿揚水清如太守否東山奈此蒼生何家中安樂無相念只說夜吟苦子多

序張母苦節行

張母劉二十六而寡貧能事姑撫一子中堂無其足跡
室未嘗廣且深望子長依子老淚在故人之棺合塵以
寸余聞而悲之其子某有俠性能與豪貴人遊客於揚
州見余述前狀且曰天下幽苦節義皆願得朝廷旌賞
某微無力唯求明公一言耳母年已七十正當壽之日
吾意爲彼婦勸乃與某酒如獎其母爲之歌曰

長箴何處來臨觴故默默汝本不能憂胡爲動顏色有思
或有求但言勿歎息今日老母壽虛堂必悽惻只有兒一
身遠行儉黍稷老人熟憂愁容易生舊憶若論舊事悲道

之摧胸臆父方三十天吾少無所識稍長母爲言發聲輒
氣塞去者不可呼三歲兒匍匐知汝能成無不耕復廢織
便欲捨汝去他家就衣食皤皤祖母饑安忍鬻離側以茲
勉治家艱難一身力何時汝殊人消我百年盡吁嗟此言
何其哀滿座聞之起徘徊人生多半爲情苦黃鵠一去幾
時來但得生存尙無恙請君遙上酒一杯

行自芍園歸所思頓發念向與王果玉采花梅莊下
興致頗異因寄與之

憂來若無事悠悠便出門不覺人里遠已復至一村深竹

蔡忠烈公遺集 卷四
三
隱諸花其中自成園老圃正鋤倦揖我進東軒雜坐理素
琴良久酒一尊慰勞童僕休相對起孤言唯餘芍藥侍微
風用相存苟能向我笑豈有知己恩采采爾勿爲持此長
恨端所思不可見吳月滿平原

答余朗生餽魚鱠

忽然夢卿去酒香破醒來應知鱸膾上猶自少兩頤

東蕭栩栩仲

蘇酒一樽在藤花兩朶紅若能便過我鶴立望青風

別朱王孫

一榻楊花下吾歸焚舊詩王孫才若爾貧士愧何爲念四
橋邊月十千酒後棋夢中若有路卽此是相思

倚綠玉而思乃雕新篁爲之畱別

我之來矣煙幙綠枝日歸日歸能不爾思

荷亭畱別廣陵諸子

久已夢歸遲此身江干日暮送行人慙歎池上蓮花發萬
里相思隔一春

歸棹松江縱覽天半搔首此身作遊客也鄭冲素索

詩走筆贈之

蘇東坡公集卷四
我行在舟中寂寂思我友涼風與卿來正可接盃酒所讀
古人詩相知太長厚我已不如卿勿云非俗偶但醉視白
雲此別薄一斗

次嘉興鄭冲素將別請作一詞呼筆墨立與之

雨冥冥兮六月寒北遊南歸兮行路難綠依依未去柳芳
杏杳而藏蘭送子嘉興引離思之新翰我朝行兮雲之端
子夜宿兮河之干釣溪有月越酒無歡子早歸兮勿盤桓
樓上秋風起聞人掩鏡看挂荔枝于團扇以俟子歸時之
警餐

南歸懷胡叔中許若木

便作思歸客如何六月歸但知相念久不忍尙睽違此去
青山盡正當明月輝囊中有越贈爲子換秋衣

自文圃歸輪山和王果玉

水滿芋田風正涼秋深歸去又他鄉無情油壁車中夢欲
認前山半夕陽

飲史納雲梅園

四圍香雪壓闌干台放高枝不畏寒日暮霜濃歸去也亭
前又作幾回看

植元

章德

德彭

宗裔應魁全捐刊

鍾音

德佳

友蘭

